

Kulturikkut suliniuteqarsimasunut nersornaasiinermi oqalugiaat

Kultureqarnermut, Ilinniartitaanermut, Ilisimatusarnermut, Ilageeqarnermullu Naalakkersuisoq, Mimi Karlsen 21. juni 2009.

Ataqqinartorsuaq Dronning Margrethe, kunnigikkormiutut ataqqinassusullit Prins Henrik, Kunnigissaq Frederik nuliau Mary, tusagassiutitigut naalaartut isiginnaartullu, najuuttut, qaaqqusat, nersornaaserneqartussat ilaqutaasullu.

Namminersorlutik Oqartussat kulturikkut suliniuteqarsimanermut siullermeerlutik nersornaasiinissaannut maani Qeqqani Ilinniarnertuunngorniarfiup inersuaani tunniunneqarnissaanut tamassi tikilluaritsi.

Naalakkersuisut aalajangersimavaat kulturikkut suliniuteqarsimasunut nersornaasiuttagaq ukioq manna inunnut marlunnut kulturikkut malunnaatilimmik suliniuteqarsimasunut aammalu kulturikkut kingornussatsinnik ataqqisatsinnik eriagisatsinnillu aallutaqartunut takutitsilluartunullu tunniunneqassasoq.

Ullumikkut Inuiattut Ullorsiornitsinni Namminersorneq eqqunneqarpoq kalaallisullu oqaatsivut pisortatigoortumik inissisimalerlutik, taamaammatt kulturikkut suliniuteqarluarsimasunik nersornaasiinissamat oqaatsinik annertuumik suliaqarsimasumik nersornaasiinissaq pissusissamisoorsorinarpoq.

Nersornaaserneqartussani siulleq tassaavoq angut 80-inik ukiulik ilisarismannitserpassualik, kalaallisut oqaatsivut pillugit annertuumik suleqataaffeqarsimasoq suliaqarsimasorlu.

Nuummi inunngorpoq angajoqqaaralugit sanasoq Peter Lund nuliau Helga Lund. Qatanngutigiianni arfineq-pingasusuni nukarliit pingajoraat.

Ilinniarfissuarmi ukiuni arfinilinni ilinniartooreerami ajoqitit ilinniartitsisutullu naammassivoq, ilinniarninilu qalleqqillugu Ranum Seminariami ukioq siulleq ilinniarnertuunngorniarluni ukiuni tulliuttuni tallimani ilinniareerluni Skandinaviami tamarmi akuerisaasumik ilinniartitsisutut naammassilluni. Aasaanerani atuannigiffeqartarneq atorluarlugu nalunnermut ilinniartitsisunngorpoq aammalu pequsiornermik ilinniarluni. Ilinniartitsisutut Middelfartimi atuarfimmi atorfinippoq

eqaarsaarneq, sananeq eqqumiitsuliornerlu atuartsissutigisarlugit. Ilaquttani ukiut qulingajaat takusimanagit 1958-imi Nunatsinnut uterpoq. 1960-imi Aasianni efterskolitoqqami atorfinippoq ukiullu arfinillit assut alutorsaatigisaminik avannaamiutut inuulluni. Kingorna atuarfeqarfimmi pisortatut Qaanaami atorfinippoq, taamanikkullu sulinnigiffeqartarneq iluatsillugu Københavnip Universitetiani ilinnialerpoq, ilinniartsitsissutillu arfinillit soraarummeerfigalugit.

Københavnip Universitetianiit 1970-imi nunatsinnut uterami allattaaseq sammisalerilerpa, Oqaatsinut Allataatsimullu Ataatsimiititaliami siulittaasuunngorluni. Periusissat assigiinngitsut misiligarneqareermata nipit isummamik allannguisartut tunngavigalugit allattaasissatut siunnersuut saqqummiunneqarpoq. Allattaasitaaq 1972-imi akuerineqarpoq 1973-imilu atuutilerluni.

Nersornaasigassatta sunniuteqarfiisa Nunarpullu tamakkerlugu ilisimaneqarluarneranut peqqutaataasut ilagaat, radiukkut aallakaatitassiani assigiinngitsuni peqataasarnini, tassuunakkullu oqaatsivut kisiisa pinnagit arlappassuartigulli aamma imaannaanngitsunik ilisimasaqarnerminik misilittagaqarnerminillu ersersitsuarpoq.

Ilinniarfissuarmi ukiorpassuit lektorit ut atorfeqarpoq soraarninngoraluarlunilu oqaatsivut aallutariuarpai itinerusumik paasisaqarfigiumallugit.

Nersornaaserneqartussap aappaa tassaavoq arnaq 55-inik ukiulik, piniartuq takornarianillu sullissisartuq. Sisimiuni inunngorpoq angajoqqaaralugit Ingeborg aamma Anda Jerimiassen. Marlunnik paneqarpoq marlunnillu ernutaqarluni. Kigusiortutut ilinniarsimavoq nujalerisuusimallunilu. Nujalerisuuneq peqqinnarinnginnamiuk aalajangerpoq piniartunngorniarluni. Nunatsinni arnat piniartutut inuutissarsiuteqartut amerlanngeqaat.

Arnamik pineqartumik kulturikkut nersornaasiinissamik innersuussinermi tunngaviuvoq kalaallit ileqqutoqaat ilaquttaminit ilisimalersimasani pingaartilluinnartuummagit. Sulisarpoq angutitut arnatullu, qasuffeqanngitsutullu illumi suliassat suugaluartut pitsaasumik ilusissamittullu naammassinissaasa tungaannut suliuartarluni. Pilinermi siulimi periusaat malillugu pitsaassusilimmik suliaqarnissani pingaartitaraa ilisimannngisanilu iternga tikillugu paaserusuttarlugit. Imminut piunaffigiuartuuvuq.

Utoqqarnik ataqqinnineq ilaqtutanullu qanittuuneq kalaallit kulturianni pingaaruteqarlutik inissisimapput. Inuiattut pingaartitat taakku nersornaasigassatta salliutittuarpai. Ulapikkaluarluni utoqqartani isumagiuartarpai taamatullu ilaqtutani. Tamanit naatsorsuutigineqarsinnaajuartarpoq.

Sisimiuni takornarissanik angallassisartutut sulinermini kalaallit kulturiata qaffassisumik pitsaassuseqarluni ersersinnissaa pingaartittuarpaa, soorlu atortutigut, atisatigut pissusilersornikkullu. Takornarissanik qimussiussigaangami puisip amiinik sanaanik atisaqarnissaat pingaartilluinnarpaa, taakkuami issittumi angalanermut nalissaqanngitsumik naleqqussagaapput pisariaqarlutillu saniatigullu takornarissap ataatsimut nuannersumik misigisaqartinnissaanut pingaaruteqarlutik. Oqariartaaseraa takornariaq pitsaasumik pineqaruni misigisaqarlualunilu Nunatsinnut uteqqinnissaa allanulluunniit unnersiornissaa qularnassanngitsoq.

Nuannaarutigaaara oqaatigissallugu Naalackersuisut ukioq manna kulturikkut suliniuteqarluartutut nersornaaserneqartussatullu Miilu Lars Lund aamma Johanne Bech toqqarsimammattigit.

Siullermik Miilu Lars Lund, kulturikkut takutitsilluarninni oqaatsivullu pillugit suliatit annertuut pillugit qujanaq, ilaqtutatillu pilluaritsi! Nersornaatissavit uppernarsaatitaa aningaasartaalu ilinnut tunniunniarpakka.

Nersornaaserneqartussallu aappaa Johanne Bech, kulturikkut takutitsilluarnarit pillugu qujanaq ilaqtutatillu pilluaritsi! Nersornaatissavit uppernarsaatitaa aningaasartaalu ilinnut tunniunniarpakka.